



鯤溟先生詩集卷三

吳郡郭諫臣子忠著

甥韓世能

全校

男元夔

五世孫鸞重刊

元旦聖節口占二絕

五更膏沐去朝天萬曆今朝又一年
江海孤臣時捧檄寸心常在聖人前

晨夕嚴裝上帝都聊從遠地效嵩呼
方今天子真明聖夏啓周成得似無

新正二日與客虎丘敘別

山樓與客進椒漿鐘磬時聞到下方城雪尚留殘
臆意江梅微露早春光宦情本似浮雲薄別意空
隨逝水長回首自憐歌舞地煙花三月在他鄉

春夜洛社舟中敘別

一篙春水暖浮煙洛社溪頭夜泊船對客欲烹陽
羨茗呼童汲取惠山泉燈前高會逢新歲醉後狂
歌逐少年他日相思何處是吳山回首白雲邊

途中寄別方司訓

幾年同結青山社此日還乘畫舫行愧我風塵緣
薄宦憐君煙月倍多情雲中孤鶴嗟何遠海上閒

鷗自不驚高蹈如公真足羨深源出豈爲蒼生

夜宿儀真公館

風色晚來定濤聲聽漸平大江當縣繞片月近人
明栢府寒烏集松堦夜鶴鳴沉吟燈下坐多少別

離情

途中憶諸兒孫

客路迢迢憶鳳雛草堂羣聚日歡呼一時尚未離
慈母他日期當作丈夫世說神駒堪上廡誰憐老
驥倦長途幾回月落關山夜恍惚神游在五湖
過滁陽陸五臺李漸菴許敬菴三丈招飲公

長安歸二日照
房孝子名曰平
富

館賦別二絕

滁上相逢盡故人張燈開宴意何親欲知別後相思處豐樂亭前月一輪
衆山環列翠微屏故舊相看眼竝青明月滿堦賓客散令人空憶醉翁亭

元夕宿池河驛

馬上逢元夕令人憶故園月中絃管沸燈下綺羅繁火樹當空列人煙徹夜喧客途今寂寞獨坐向黃昏

臨淮北渡

馳驅江路遠此日渡淮河睥睨低紅日旌旗漾碧波春光看柳變煙景翳帆過身係浮名去歸期奈若何

宿州道中遇風有感

向晚風猶急長途日易昏征人尋宿處馳馬望前邨過隴牛羊下歸林鳥雀喧宦游此風景勞役共誰言

彭城懷古

江淮北上古徐州城下黃河日夕流煙火萬家連兗豫舳舻千里向燕幽春風草長王孫路夜月塵

迷燕子樓驛畔孤墳碑廢久行人指點說留侯
行次河間路聞外補

馳逐風塵際悠悠祇自憐除官當歲晚為客在春
先去國緣多口還朝知幾年淮陽稱臥治不敢擬
前賢

過白溝河

回首鄉關去路遙白溝河上度星軺滄洲日落迷
煙草紫陌春歸在柳條身外浮名何足羨鬢邊華
髮不曾饒自憐瘦骨仍多病奔走風塵肉暗消

暮抵雄縣

鼓樂喧闐震耳鳴遠勞車馬出郊迎平沙隄上留
行轍弱柳風前拂去旌添我腰黃誠異數悞人頭
白是虛名從今勘破人間事好向湖山續舊盟

過琉璃河

平沙一望接京師獨上河梁折柳枝日煖冰消春
水漲分明千頃碧琉璃

都門外報國寺夜坐書感

徵書歲晚下江鄉走馬來瞻日月光咫尺君門天
萬里燈前寂寞夜偏長

登報國寺毘盧閣

昆盧高閣倚層雲
仗劔閒登日未曛
萬頃煙霞天外落
九重城闕望中分
雪晴山色當牕見
風動鈴聲下界聞
徒倚闌干時縱目
皇都佳氣正氤氳

廣庭步月有感

春月流輝浸碧松
廣庭閒步自從容
幾年湖海來京國
此夜空聞長樂鐘

都門與王比部馬憲副申內翰三同年敘別

二首

昔日看花伴
今晨喜盍簪
宦游來薊北
送別過城南
紫陌春融雪
青山曉護嵐
情深頻進酒
非是愛

沉酣

歸臥江鄉久
時從檄召來
分藩到庾嶺
策馬去燕臺
聖主原無意
微臣自不才
子然湖海客
知向幾時回

涇陽驛口占

幾日馳驅未出燕
風沙滿眼路難前
孤蹤遙向天南去
回首長安在日邊

趙州懷古

長楊夾道引鳴騶
夜宿燕南古趙州
草滿叢臺非舊日
月明泚水只空流
也知此處荆榛地
多是當

年歌舞樓陵谷變遷人不在關河煙鎖古今愁

柏鄉遇銓司舊吏時為縣尉賦此

客途逢故吏知我舊銓郎作尉同梅福之官在柏鄉嚴城勤斥候傳舍盛供張更向虞君問云何去廟堂

柏鄉懷古

路出柏人邑令人憶貫高捐生蹈虎尾視死若鴻毛漢主那堪迫商山自可逃區區圖雪恥寧惜趙王敖

晚過內丘

晚過內丘縣東風輕拂衣雲旌去縹緲煙景漸霏微故里花將發他鄉客未歸兼程日南往中夜夢魂飛

夜宿順德公館

侵晨歷趙境薄暮宿邢臺秉燭當軒坐鈎簾待月來青衫春漸薄綠酒夜須開佳景方留戀城頭鼓又催

沙河縣

邢臺南望路迂斜一縣周圍盡白沙日映郊原鋪玉雪風生林木綴瓊花霜前蚤起應迷鷺月下歸

來止辨鴉試問當年檀道濟唱籌量得幾多車

邯鄲早發抵車騎關漫興

行次車騎關猶是邯鄲道雞鳴夜已闌馬嘶天漸
曉旌旆風飄飄川原日杲杲行看煖氣回轉覺春
光好新柳綠堪憐亂山青不了天畔送歸鴻陌上
聞啼鳥游子未歸家故里生芳草因想宦游人馳
驅空易老

渡漳河有感

輕浮一葦渡漳河時聽舟人起櫂歌山自太行西
望遠路從全趙北來多春深諸塚埋青草歲久三

臺浸碧波日暮停車倍惆悵英雄千載類消磨

淇縣

淇水湯湯日向東居民似有上皇風始知世變風
移久浪說桑間與上宮

經牧野弔比干墓

牧野荒荒落日低愁雲深鎖比干祠寧將血濺商
家土忍見頭懸太白旗麥秀春郊麋鹿走花殘夜
月杜鵑悲古來忠直多磨滅千載令人淚滿頤

延津道中

五更辭衛郡百里過延津馬踏晴沙日鶯啼紫陌

春軟風隨弱柳細雨浥輕塵漸向東南去韶光別樣新

封丘道中

昨擬走大梁覽勝古汴京晨起延津境忽作封丘行山川本相似途路近且平遠馳燕趙騎復捲魏衛旌曉行趁殘月暮宿視長庚客途少休息傳舍多送迎思之良厚顏不如且歸耕所以晨夕內勞勞苦東征東征倦行役對鏡徒自驚

渡黃河遇風

河上東風吹客袍中流濁浪拍天高平生不識風

波態今日方知涉險勞

杞縣懷古

杞邑名何始分封自有周報功宜百代置縣已千秋草長多新壘花開滿故丘方今病河患誰宅此神州

甯陽公館雨夜獨坐

高館張燈坐悽然思不禁春風隨客遠夜雨滴更深漫說金橫帶還愁雪滿簪流光看易過對酒獨沉吟

夜宿會亭公館

古驛當周道環居多樹林一番春雨後千里使星
臨苔暈侵堦長花香入院深燈前看綠綺何處覓
知音

夏邑道中早行

東郊旭日遲遲起好鳥枝頭啼不已三杯濁酒漸
微醺頃刻前行數十里鞍馬晨衝楊柳煙旌旗夜
溼梨花雨風光到處自堪憐隨時歡賞人能幾

永城太丘驛

人傑從來使地靈永城猶借太丘名當時黨禍人
皆死豈謂君因獨弔生

固鎮道中

雨後淮南路山原入翠微春風花漸發社日燕初
飛曲水迴官騎香泥染客衣江鄉寒食節早晚望
東歸

王莊驛遇同年劉憲副

看花昔日曾為伴南北東西各一天萍水相逢疑
是夢金蘭契合已多年郵亭晝掩梨花雨客路寒
迷楊柳煙聞說鄰家春釀熟一尊聊共醉燈前

回過滁陽重別太僕三省丈

春來為客走燕關歷盡千山與萬山燈月滿城時

北上煙花三月又東還眼前好景真成幻身外浮
名總是閒別去五湖堪浪迹一帆春雨下荆蠻

上巳早行見霜

上巳今朝是清霜昨夜飛色侵千戶曉寒損百花
肥虛布青皇令翻成白帝威早行前路客引領望
朝暉

上巳日過大柳驛

積雨初收列嶂青花開疑入錦雲屏風前舞燕迎
人語陌上鶯聲喚客醒乘傳兩番經柳驛流觴千
載憶蘭亭韶華滿眼辜清賞空逐征車作使星

上巳日南過滁陽

南去滁陽日未西四山環聳碧天低溪浮荇帶牽
魚尾風落榆錢襯馬蹄社後已看玄鳥至春深時
聽杜鵑啼鄉關回首多芳草漫把王孫歸路迷

夜宿六合縣僧寺

鳴騶入古寺借榻近高僧欲聽三乘法因傳五夜
燈茶煙浮竹暗花雨向堦凝猶自牽塵鞅皈依惜
未能

寒食後一日途中口占

一春潦倒客天涯幾度芳辰不在家寂寞江都寒

食後東風吹老故園花

清明日江上遇雨

濛濛煙雨細如絲
冷拂檐帷溼不知
寂寞途中忘
令節淹留江上數
歸期酒從茅店分
榆火人向柴
門插柳枝猶記
去年當此日
桃花萬樹醉
蟠螭

儀真寄同年潘明府

聞君作宰臨光澤
花發公庭映賜袍
燕闕北瞻紅
日近越鄉南去
白雲高
江天鴻鴈違
千里宦海風
塵欲二毛
憶昔同遊今數載
相思中夜夢
魂勞

舟中喜晴

夜向篷牕聽雨眠
朝來時喜乍晴天
風生野店青
帘颺露浥沙隄
錦纜牽花氣
氤氳蒸曉日
柳絲嫵
娘弄輕煙
鄉關自恨歸來晚
狼籍春光在客邊

春日過同年伊祠部

日暖江城雨乍收
花開三徑為停騶
文園君自猶
多病宦海予今已
倦遊世事看來同
失馬機心忘
却不驚鷗相逢
鮑叔應憐我
奔走風塵欲白頭

晚春歸蠡西舊宅

獻歲辭家春暮歸
故園花已過芳菲
雨餘細草侵
苔徑風颺遊絲
惹薜衣
漫說鶯遷喬
木轉還看燕

向舊巢飛他年謝却人間事十尺長竿一釣磯

暮春日有懷覺海圮公虎丘義公一首

獻歲客天涯春深始到家東風吹玉版夜雨長金
芽久與高僧別翻嫌去路賒遙思禪定後池月浸
袈裟

三月三十日登虎丘

攜酒登山閣危闌日欲斜汲泉臨石澗試茗到僧
家無意聞啼鳥傷心問落花來朝春已去空自惜
年華

新夏日訪錢文學兄弟

一舸漕湖上投閒訪故知入門清晝永到處綠陰
隨已負鶯花約還尋雞黍期東南稱具美欲去更
栖遲

贈方司訓子靜次許太僕韻

學道同商皓談經擬漢儒予慚葭倚玉君喜浦還
珠春水從鷗遠閒雲伴鶴孤扁舟五湖上塵思似
應無

將往贛南治行二首

久向吳中臥時將嶺北遊一官聊染指五月尚披
裘座上拈桑落燈前理蒯緱行期尋復改端為故

人留

懶性真堪棄虛名復見推且當從吏隱未敢卜歸
期遠道少音信深閨恨別離傷心對桃葉垂老客
天涯

仲夏與客泛石湖

白舫湖中飲青山座上看日光浮浪出湖色入簾
寒遠市煙初起深林雨未乾故人同勝賞潦倒厭
微官

夏日過村居即事

不到家園久柴門碧草生鳥驚行蓋起犬向主人

啼鶯
迎入院茶初熟開樽酒復清幽軒日正永花外有

夏日舟次平望與諸故舊敘別

吳中一臥幾經秋此日重為嶺北遊澤國風生帆
正遠楚天虹見雨初收強將懶性移青雀漫把閒
心對白鷗好趁晚涼維綠柳故人燈下共淹留

錢塘江上起行

前渡桐江水江清異汨羅北來吳地盡南去越山
多遠市青帘出危檣白鳥過薄遊何日返散髮傲
煙波

夏日過武林同年滕學憲邀遊湖上賦別
薰風一葦繫長堤歌舞初停日已西
十里荷香侵座遠六橋柳色帶煙迷
虛名世上同蝸角浪迹天涯信馬蹄
且喜故人相對飲松林蘭若更攀躋

桐廬道中

揚舫江上喜初晴兩岸山光夾鏡明
到處水流寒澗出插天峰吐白雲生
遠洲浴鷺衝潮起深樹新蟬吸露鳴
前向嚴陵臺下過高風千古不勝情

雨中上嚴灘

山雨勢傾盆江流萬馬奔陰霾迷日月
濁浪簸乾坤

坤舟楫上還下煙林吐復吞宦遊瀕絕險
空爾暗消魂

蘭溪道中

山雨朝來歇江流午漸平帆從天際落
人在鏡中行孤鳥入雲沒羣峰接漢清
孤舟時晏坐何處棹歌聲

月夜江行

夜色侵窗曙灘聲入座喧遡流臨皓魄
乘興倒芳樽山斂微雲盡天從遠水吞
滿懷風月思難與俗人言

衢州道中

侵晨鼓棹發三衢南去常山百里餘坐引清風生
枕簟閒消白日在圖書山橋旆颺催沽酒蘋渚舟
來喚買魚漫說宦遊多勝賞倦遊今已類相如

自常山抵玉山途中作

亂山青四合江浙路中分草露沾香徑松風掃白
雲遙趨南贛檄深愧北山文士女道旁立相看舊
使君

山中晚眺有感

一路斜陽裏青山引客車幽花生澗曲修竹繞鄰

居天晚鳥飛倦途窮馬力徐宦遊味如此何日遂
焚魚

早發進賢過羅溪湖上

山城侵曉發花露溼星軺日浴湖中水虹飛堤上
橋柳塘風漸起荻渚霧全消傳食真堪愧何能答
聖朝

宗室以詩見贈次韻奉酬

清朝水鏡愧虛名握節重爲嶺北行嬾性怕題鸚
鵡賦畏途時聽鷓鴣聲十年予老淹吳會八斗君
才冠鄴城何日還期開蔣徑花前倒屣一相迎

峽江舟中晚坐二首

晚涼時喚酒雨黑似催詩澄水映肌骨微風洒鬢
絲高吟蓮葉舫頻進桂花卮醉向篷牕立斜敲白
接羅

午向金川過宵從玉峽來沙邊雙艇泊燈下一樽
開劒氣凌南斗薇垣逼上台遐方時戀闕飛夢到
燕臺

江上聞笛

江上浮仙棹誰將玉笛吹時聞折柳曲更聽落梅
詞響遏行雲散聲隨斷角悲關山今夜月應起故

園思

舟過白沙驛

向晚江城霽揚舫過白沙風塵千里客煙火萬人
家簾捲山光入帆隨日影斜重遊今十載空復惜
年華

太和舟中晚眺

坐深棋局散落日已銜山鴉散浮雲外蟬鳴深樹
間客邀新月飲漁趁暮濤還醉後看襟袖淋漓綠
酒斑

江中夜行

夜倩漁舟引前行路不迷沙洲隨岸曲星斗向江
低解道身如寄還拚醉似泥更闌頻剪燭水次已
聞雞

舟抵贛城水西驛二首

仗節臨江鳴騶過水西貔貅當路擁旌旆拂雲
齊列嶂青環郭平沙白滿堤倚闌時縱目江草暮
萋萋

一棹四千里茲晨抵贛州嶺雲隴樹暝江水抱城
流烏度煙林晚蟬鳴幕府秋蒼生空屬望此意未
能酬

雨後與徐兵憲郭叅戎同往水西寺宴客
雨過江城霽鳴騶到法堂臨池開小宴入座動微
涼竹送層軒色荷生滿院香高朋同勝賞爾汝意
俱忘

立秋日飲劉公幕府

幕府初開宴凭軒花竹幽涼風時自至酷暑坐來
收膾送銀絲細觴飛玉液流夕陽賓客散蟬噪已
驚秋

贛城官舍遣興

東山復起為蒼生一路虛傳是福星江郭有時雲

自白公庭無事草新青
蟬鳴深樹涼飈動
鶴唳空堦午夢醒
退食小齋還自愧
蒲鞭不用戶常扃

齋中向晚即事

炎方無事早休衙
坐盼庭柯日影斜
小閣傍林含宿雨
疎簾隔水映殘霞
拋書几上看修竹
運甃階前踏落花
自笑年來成吏隱
夢魂飛不到京華

夜起

夜起中庭坐
秋聲滿樹間
飛星渡銀漢
殘月落蒼山
迢遞雙闕句
宣到百蠻幽
懷清不寐凋
謝鏡中顏

秋夜起坐

忽驚秋思動
涼飈起坐幽
齋夜寂寥
月色半窗天
欲曙秋聲滿
院暑全消
虛名世上真
成夢
隱士山中早見招
况復官閒公事少
自慚無補聖明朝

送陸山人歸吳中

遠送東歸客
江帆挂夕暉
路從千嶂隔
心逐片雲飛
社日燕還去
秋風鱸正肥
故鄉何日返
覓取舊荷衣

舟中重送陸山人

日暮滕王閣
歸途此地分
江空帆度影
海闊鴈離

羣故里同明月遐方多白雲一官匏繫此聲蹟未
曾聞

再寄方司訓

酷有登臨興頻隨杖履遊杯浮覺海月舟泛石湖
秋苦作籠中鳥難同水上鷗何時重會面一寫別
來愁

秋日登滕王閣

高閣崔巍入太清閒來登眺不勝情開簾山向樽
前落俯檻雲疑衣上生夕照霞飛紅欲斂秋江水
漲綠初平乾坤納納堪容我愧縛悠悠世上名

中秋十一夜劔江舟中

客路秋將半連宵月漸佳星文動雙劔江色映孤
槎雲度簫聲遠風生燭影斜迢迢此良夜飛夢繞
天涯

臨江道中夜坐

蘭舫下蕭灘江清浸月寒鵲飛沾露溼蛩響徹更
闌貫酒拈杯坐篝燈把劔看宦遊多涉險底事效
彈冠

新塗舟中晨起

篷牕初睡起旭日照金川縹緲雲依樹微茫水接

天鄉心萼菜外秋色蓼花邊點檢登臨興淒涼異
昔年

十四夜太和舟中玩月

江月纔幾望長空銀浪生一輪秋未滿萬里夕同
明影散黃金粟光搖白玉京關山當此際多少別
離情

江上晚坐有懷

薄暮涼風發帆懸落照飛天長人去遠秋到客思
歸沙鳥羣還集檣烏隱漸微坐看明月上杯酒莫
相違

十五夜萬安道中玩月

中秋佳節今宵是遠駕孤槎客裏逢霽景煙消秋
湛湛晴空月射水溶溶白榆花浸銀河冷丹桂香
浮玉露濃猶記當年湖上飲清光遙映二高峰

由萬安山行回贛途中雜咏三首

南向虔中去綠江細路斜蟲絲懸古樹鳥迹印晴
沙山背雲移石林根露泣花眼前秋色好幽興在
煙霞

飛蓋行山徑穿松過野橋霧連江樹暝天接嶺雲
遙過客多隨伴居民半是樵前行無傳舍借榻度

今宵

雨足山田稔秋高澗水清路從雲外繞人在瘴中行野草齊腰長幽花照眼明勞勞苦行役端只爲虛名

晚過烏兜宿郭秀才家

晚過烏兜里時逢難弟兄茶煙秋院寂燈火夜堂清緩帶移時坐開樽待月明來朝人別後門掩讀書聲

蚤起

五更雞唱酒初醒桂影橫堦月滿庭門外砧敲秋露冷堂前燭吐夜煙青林含爽氣生靈籟山接長河見落星宦海茫茫無定所自憐蹤跡類飄萍

秋夜與徐兵憲東軒小坐

桂軒庭院酒微醺戍鼓遲遲夜欲分對客披襟還促席呼童煮茗更論文風搖燭影當軒曙露冷蛩聲到處聞此夕相過投轄飲真成下榻爲徐君

秋日閒登齋閣

齋居少塵事散帙獨登樓疎柳江城暮孤雲嶺徼秋秋風清客思夕籟動鄉愁徙倚還因嬾朱簾不上鈞

虔城秋暑

地與炎荒接秋高暑尚煩納涼開北牖看竹敞前
軒幽砌蝸潛出深林鳥自言江鄉鱸正美何日返
家園

重陽日約徐憲副同登通天巖

破曉山行露未晞旌旗縹緲度煙微醉傾綠醕移
時坐笑對黃花竟日歸嶺徼秋光供勝賞洞天霞
彩送斜暉相逢幸有南州彥豈向東籬羨白衣

山中遲魯源不到口占

仙巖遲客來清曉麋鹿成羣齧瑶草山堂坐久景

蕭然滿庭黃葉無人掃

遊志歸巖

幽谷生靈籟虛巖落翠微行吟興未已日暮竟忘
歸

秋日郭叅戎攜酒過袁侍御園亭小坐

柱史今何在園亭秋氣清小山浮水出孤月浸空
明池映寒花影庭多落葉聲移樽醉山簡對景不
勝情

月夜水閣宴客

良宵張宴集高朋水繞亭臺片月明露下銀河秋

氣爽風飄金粟夜香清坐中笛奏梅花落醉後杯
浮竹葉傾酒散歸途人已靜時聞鼓角動江城

贛城秋晚

散衙行市里正值暮秋時露冷芙蓉老林疎橘柚
垂西風鳴盡角細雨掩青旗書去鄉關杳悠悠千
里思

齋居夜坐

小齋人靜後獨坐夜迢迢林外砧方急燈前酒欲
消砌蛩悲露切嶺鴈阻天遙空抱煙霞癖無能遠
市朝

虔城官舍遣興

齋居苦離索轉覺宦情微庭引蝸涎繞風吹鳥毳
飛秋高鄉國遠日晏吏人稀向晚東樓倚閒吟竟
落暉

暮秋與徐兵憲郭叅戎同登望江樓二首

層樓高駕大江濱與客銜杯醉夕曛地控荆甌山
四繞臺臨章貢水中分旌旗霞映紅成綺金鼓風
飄響入雲回首更憐秋色晚滿城黃菊送清芬
江城秋老景扶疎極目江天思有餘楓染微紅霜
落後橘垂新綠鴈來初十年湖海牽塵鞅萬里關

山畏簡書底事登高空悵望故鄉此日正鱸魚
秋日姚山人自楚適嶺南道經虔中過訪贈
別二首

夙有煙霞興空慚湖海遊憐君渡湘水訪我到虔
州龍劔元珍重蟻珠豈暗投大庾明月夜相約一
登樓

久向吳中臥今爲嶺外行風塵千里客琴劔一書
生瘴海秋將盡關山月自明莫愁途路險南越已
銷兵

夜宿南康公館

停驂投傳舍獨坐向黃昏落葉風前舞寒蛩露下
喧薄遊瀕瘴海飛夢到家園醒後悲身世羝羊苦
觸籬

大庾道中

馳逐空山路蕭條鬢欲星溪深人病涉橋斷騎還
停瘴氣連雲黑峰高出漢青自憐塵世上江海一
浮萍

晚登南安公館後樓

夕陽煙郭萬山圍暮倚危闌挹翠微嶺海天高人
北望江湖秋老鴈南歸疎簾風透還吹帽虛檻雲

來欲上衣興比庾樓真不淺坐看明月漸輝輝

梅嶺山閣晚坐

百越南來此嶺分荒煙落木翳斜曛停驂緩帶臨
丹閣俯檻拈杯坐白雲峻壁棧懸通鳥道古碑苔
長沒龜文沉吟不覺天光暝歸路喧傳迓使君

雨中自南康回贛州作

客路通宵雨篷牕徹曉寒濃煙護林薄新水浸沙
灘隔浦蘆花白經霜楓葉丹買山資已辦何必戀
微官

初冬贛城官舍思歸

春來策馬向關山歲晚蕭條憶故園自識犧牛終
伏俎從來野鶴怕乘軒彈冠漸入垂綸景報國空
懷曝背暄世事悠悠多變態片帆歸去復何言

月夜中庭散步

病骨終朝臥鄉心萬里馳朔風吹漸定山月出何
遲玉宇清輝發瑤臺疎影移小庭叢菊滿冉冉露
華滋

東軒對菊與僚屬晚坐

南菊堪幽賞邀賓共舉杯叢黃經雨綻縹白傲霜
開晚景當軒聚寒芬入座來相逢宜盡興戍鼓莫

頻催

曉發贛城江行下省

蕩槳初開雲水涯
江頭日出照晴沙
波搖荻渚飛銀練
霜染楓林散綺霞
蝦菜總歸漁父棹
鴨欄多近野人家
孤臣去國頻經此
隨分優游度歲華

晚泊攸鎮宅

一官羈嶺北千里下湖西
疊嶂連天起浮空去水
低灘高舟避石地
僻驛臨堤坐向黃昏後
清猿抱木啼

過皂口驛

江霧晨開霽舟行路渺茫
青山寒映水紅葉飽經
霜豚柵依茅屋魚繒掛石梁
客途多勝景欲去不能忘

江上曉行即事

江上朝來景微茫
煙水昏木蘭千里棹
楓葉萬家邨樹末
山光繞波心日影翻
幽懷兀自寂對此復何言

冬晚舟行劔江

朔風千里疾畫舸一帆輕
山帶寒煙暮江翻雪浪
明沉吟憐獨往馳逐繫微名
徙倚蓬窗久悠悠無

限情

暮抵豐城途中偶述

江上揚舲趁晚風，隔窗煙霧畫濛濛。
蘆花寒映平沙白，楓葉時兼落照紅。
自分疎狂成傲吏，敢言流俗笑愚公。
終當脫却樊籠去，一棹長歌笠澤東。

暮發南浦

薄暮雪初晴，揚帆江上行。
簾窺寒月影，枕納夜濤聲。
地迴魚書杳，風高鴈陣驚。
鄉心兼旅思，耿耿不能平。

江上偶述

天畔寒雲翳日輪，煙江千里一波臣。
薄遊終日嬰塵網，長嘯移時岸角巾。
漉酒每思彭澤令，灌畦甘學漢陰人。
百年光景今過半，對鏡空嗟白髮新。

峽江舟中遣興

一從綸命下公車，奔走風塵畏簡書。
五嶺自慙隨岳牧，三江無復伴樵漁。
繞籬松菊淵明徑，環堵蓬蒿仲蔚居。
幾憶故人空在目，天涯何日賦歸歟。

午過皂口驛

肩輿度危嶺，雨歇衆峰青。
靈籟雲中散，清泉石上聽。
白沙迷釣渚，紅葉映郵亭。
遙想幽栖者，時方午。

夢醒

茶花

木落空山裏，茶花照眼明。
經霜同菊傲，向日效葵傾。
氣借陽坡發，英隨雨後生。
枇杷亦何幸，獨擅款冬名。

山行

天際陰雲翳，山中午餉過。
隊衝文雉起，旗颺畫熊多。
驛騎爭泉飲，征夫出險歌。
客行殊已倦，無奈吏情何。

虔城酬贈張幼于

西風江上獲雙魚，千里遙傳尺素書。
遶屋蓬蒿憐仲蔚，滿囊詞賦憶相如。
鄉關迢遞看雲外，官舍蕭條運甓餘。
堪歎故人頭白盡，青山應許卜鄰居。

東軒

朔風晨漸息，霽景滿幽軒。
酒敵寒威散，裘迎日氣暄。
行吟憐桂影，舉步避苔痕。
岸幘徜徉久，渾忘案牘煩。

齋居二首

嶺徼歲云暮，城樓日正西。
隔林時吠犬，遠市更聞雞。
吏散思開帙，官閒學灌畦。
晚來燈下坐，分火借

青藜

詩骨偏多病齋居日閉關虛窗吟白雪高閣見青山
歲月侵霜鬢風煙近百蠻吳中佳麗地放棹幾時還

寒夜獨坐二首

官舍張燈坐悠悠心事違城高寒角動寺遠暮鐘
微宦海空糜祿風塵欲拂衣江鄉梅信早終夜夢
魂飛

一別鄉關後今經數月餘夜聞雲外鴈時檢篋中
魚報國心徒切謀身計獨踈燈前閒屈指投劾到

公車

晚登齋閣

江城住久偏多思齋閣閒來還獨登
潁水浮空晴渺渺嶺雲籠樹暮層層
幽棲近類離羣鶴兀坐聊同入定僧
自笑百年今過半欲垂青史愧無能

贈鄭廣文擢任國博

薇垣分鎮嶺雲邊詞客相逢有鄭虔
捧檄前登新絳帳談經不改舊青氈
章汀歲月風霜苦魏闕春來雨露偏
自昔入朝多見嫉莫將詩向萬人傳

夜坐二首

放衙歸燕寢獨坐向黃昏世變同蕉鹿羈栖若檻
猿未忘軒冕累暫遠市朝喧暗想連宵夢依
在故園

宦轍梅關北鄉心笠澤東未須逢狗監且自學雞
翁薄暮鴉棲樹清宵鴈唳空年來遊已倦蹤跡類
飄蓬

晚發贛城

野燒寒光慘篷牕落景催舟隨流水下鳥帶夕陽
回老去頻看鏡間來獨舉杯連朝苦馳逐忍聽暮
猿哀

江行

滄江人獨往日厭櫓聲喧水鳥傍船起陽鳥出浪
翻灘危多峭石木落見空村地與炎荒接朝來氣
漸溫

路見梅花

歲晏虔中路梅開雪滿丘春光度庾嶺地脈接炎
州影落空潭淨香飄曲澗幽月明清入夢恍惚到
羅浮

江上與郭叅戎夜話

送別青山暮歸途彩鷁新年光若流水暖氣已先

春江月遠隨客風濤夜懼人燈前陪笑語鄉曲意何親

五雲道中

縹緲雙旌動五雲遠山橫黛望中分鳴鉦宿鳥車前起陟巘啼猿木杪聞瑞日雲開庾嶺瘴寒鴉晨散楚天文年來虛忝新章貴碌碌仍慚未出羣

江上晚晴

雨歇山逾潤江行日欲晡波光時激灩煙景入虛無畫鷁村將近青蚨酒易酤醉餘還自笑天地一狂夫

立春日江上寫懷

俯仰乾坤裏悠然著此身清時去廊廟終歲客風塵腰下黃金貴簪中白髮新年光如過隙今日又逢春

吉水道中

細雨來青嶂澄流映白沙漁家從樹隱村徑逐江斜雲暗迷寒鴈風生起暮鴉薄遊當歲晚終日困浮槎

夜宿清江公館自述

江城遙帶絳河斜獨坐宵分燭吐花鳳闕自陳容

解綬鹿門今喜得移家閒居擬植千竿竹學圃還
栽五色瓜直道自來難用世好將詩酒弄煙霞

江上聞乞歸命下口占三絕

投劾清時效二疏綸音忽已下公車書生未帶封
侯相且向春風臥草廬

江上風濤險殺人便應從陸走江濱自今已得安
身策豈向天涯復問津

征車馳逐苦勞勞日晚風生舊緼袍指點前途隨
處宿不須重覓呂虔刀

山行過仙槎寺

梵閣層霄構仙槎古寺名松間羣從入石上一僧
迎映日孤雲細窺春好鳥鳴喜無羈勒累瀟灑不
勝情

宿江上人家

落日催征騎扁舟下渡江軒輿停舍館燈火照山
窗懶性真堪隱雄心未肯降良宵清不寐入枕水
淙淙

烏兜公館

孤村屈曲四山圍華構新成落翠微高棟曉迎紅
日起晴窗時送白雲飛三春花滿郵亭暗五嶺天

高使節稀此地頻過遊已倦相將重整舊荷衣

虔城與同年徐憲副敘別口占五絕

把袂江亭歲欲徂春風依舊長蘼蕪楚天漠漠人
南北君向秦中我向吳

惜別看花並馬遊天涯此日共淹留萍蹤倏忽隨
流轉碌碌風塵易白頭

話別江亭日欲晡片帆風送下姑蘇他年訪我衡
門下松竹蕭然一老夫

杯酒淋漓話轉濃嶺雲籠樹暮重重清時投効非
高尚直道從來世不容

渭樹江雲此地分且捐武事共論文關西理學今
誰主屈指儒林已到君

再別徐魯源兵憲周大川僉憲郭兩峰叅戎

一首

郵亭花發袂初分青眼相看忍別君嶺樹啼猿聽
下淚楚天歸鴈惜離羣春江水長連朝雨落日風
生萬壑雲此去聊堪同隱豹南山朝霧正氤氳

自贛抵萬安舟中遣興

一棹春江上東歸似季鷹自憐同白壁忽爾避青
蠅非是嫌官縛多應免盜憎海天鴻獨舉萬里任

騫騰

漳江門與王孫旣白敘別

漳江門外柳條青
別酒淋漓愧獨醒
千里風波淹宦海
一帆煙雨暗郵亭
匡廬西望天將暝
笠澤東歸鬢欲星
知向王孫分袂後
清猿吟斷翠微屏

餘干道中

千里東歸客
孤帆細雨舟
樹垂平楚遠
水接大荒流
冠蓋臨鮫室
家山憶虎丘
人生百年內
天地一蜉蝣

安仁道中漫述

雨後春風拂面和
江涵晴日弄微波
一帆煙景侵衣薄
兩岸山光入棹多
行篋怕添新蕙苾
故園仍長舊藤蘿
十年宦海真成夢
好把宮袍換芰荷

貴溪道中

一竿斜日映簾低
百丈遙牽入貴溪
社日忽驚玄鳥至
春風時聽鷓鴣啼
墟煙渺渺天將暮
江草萋萋路欲迷
越水吳山行漸近
芒屨到處可攀躋

晚過弋陽

雀舫東歸過弋陽
迢迢千里水雲鄉
江明倒浸孤峰影
風暖遙聞百草香
飛鳥晚來同客倦
閒花時

亦笑人忙吳門到日春光好煙柳低垂綠野堂

東歸過上饒東別沈三洲少叅

江上春風一棹歸從君乞取舊荷衣春來花底隨
麋鹿雨後山中採蕨薇題鳳有人過竹塢焚魚終
日掩荆扉白雲滿屋心常寂不管人間是與非

曉從廣信過玉山途中作

時屬豔陽景誰無遊冶情況乘雕轂去遠作玉山
行日氣蒸花暖煙光翳竹輕乾坤容我老荷芰製
初成

夜泊富陽

富陽城下泊落日映川原雲起連天目潮生自海
門客星春渚白仙舫夜濤喧嘉遯思前哲終期不
負言

夜泊嘉興北門

解官千里至新月一鉤懸秉燭青樽畔停舟綠水
前春來遊子倦老去故人憐客路煙花滿狂心逐
少年

鯤溟先生詩集卷三

鯤溟先生詩集卷四

吳郡郭諫臣子忠著

甥韓世能

全校

男元夔

五世孫 鸞重刊

江村寒食

故里逢寒食
園林紅雨飛
鶯藏新柳轉
燕向舊巢歸
老去遊先倦
年來事覺非
小牕花下坐
寂寞掩柴扉

解官歸過舊宅漫述

宦游湖海忽抽簪
回首家山歲月侵
舊識親朋多

即世新栽松竹漸成林春寒花氣沾衣薄雨霽山
光入座深寂寞柴門寒食後閒來負却一生心

春日吳郡侯枉顧山莊奉寄二首

帝里看花伴相逢數載餘當年同躍馬今日獨焚
魚自是愚公谷何勞長者車竹牀陪笑語漫自摘
園蔬

千里掛冠歸幽棲過客稀遠勞青眼顧時扣白雲
扉邨酒盈樽綠池魚入饌肥林花映五馬蓬華爛
生輝

贈陳雨泉方伯

薇省流芳錦水春還家初見二毛新山中猿鶴時
爲侶筆下龍蛇似有神戲綵試看萊子孝典衣無
復少陵貧聖朝耆德方推重會見安車下紫宸

春日郊居縣尹陳公過訪

投簪謝人事歸著芰荷衣豈謂青雲客時過白板
扉草堂論舊雨香徑藹春暉向晚回花縣雙鳧拂
棹飛

雨中與客遊石湖同飲盟鷗亭二首

細雨春山曲淋漓溼翠屏殘紅初結子飛絮欲爲
萍浮蟻新多興閒鷗舊有盟故人亭上坐相對眼

俱青

收帆還著屐湖上繫蘭橈暮雨來湖嶂春煙翳越
橋掛冠歸笠澤把酒醉花朝久已甘肥遯山翁不
用招

春暮過蠡塘別業

江鄉春欲暮宦海客初歸紫陌風光好名園花事
稀游絲罥酒幔落絮點人衣故里閑追省年來漸
覺非

欲遊天池阻雨

乘興攜賓從將臨石上池逗遛青嶂曲空負白雲

期巖雨滋花重廚煙出竹遲老僧頻進茗相對了
殘棋

贈別同年李侍御補郡

征帆遙指五雲邊君向春江思渺然我已投簪林
下隱仙舟同載是何年

登虞山拂水巖高臺

解官已作吳中隱攜客同登湖上臺峭壁日穿雲
竇破飛泉風拂雨珠來山光遶戶開圖畫湖景浮
空落酒杯乘興久拚酩酊醉林間好鳥莫頻催

琴川舟中漫述

薄遊數載苦無聞便欲攜家隱鹿門報國自慚心
未遂還鄉祇喜舌猶存竹梧高館書千帙煙月孤
槎酒一樽且向此中求適性悠悠世態復誰論

贈別王少府擢任比部

佐郡餘三載徵書正及期遙乘青雀舫前赴白雲
司落日孤帆遠清風一鶴隨東南民利病應達九
重知

蠡東即事

別業環居綠水邨倚天喬木午陰繁誅茅擬構藏
書屋倚竹還開聽雨軒小犬籬邊迎客吠流鶯花

外似人言掛冠歸後頻來此竟日曾無車馬喧

晚過蠡西舊宅與客小坐

山莊新雨霽正好納涼時返照穿簾入殘雲傍席
移鶴林留客處雞黍故人期溪上秋風早還來理
釣絲

蠡西尋舊識有客寓村莊知我停蘭棹攜樽過草
堂坐深時漸暝醉後晚生涼酒散看明月清輝滿
客裳

秋日與袁太常顧水部蔣高涼同集徐鴻臚
園亭

水國新秋日園亭欲暮時渚蓮香荏苒煙樹影參
差林際月生早花間客去遲疎狂晉山簡日醉習
家池

吳城夜歸

暮出闔閭城扁舟載月行四郊浮夜色萬籟總秋
聲露浥衣襟薄風生枕簟清蓬牕時假寐耿耿夢
難成

寄呂比部同年

尺素緘題去秋風一鴈高懸知新粉署應念舊綈
袍白下分違久青宵夢寐勞憐君公輔器擬贈呂

虔刀

秋日水竹居雜詠二首

小景開園圃層軒俯碧池捲簾看雨竹掃徑摘秋
葵社燕辭巢去寒蟬抱葉悲幽栖多野意似與道
人期

晨興方冠櫛旭日到柴門水漲知魚樂林深厭雀
喧秋光來遠嶂爽氣滿幽軒近學漢陰老忘機日
灌園

秋晚梁谿道中

向晚梁谿道秋光滿畫船山明低落日波淨倒涵

天遠市分殘雨叢林起暮煙同行俱故舊杯酒共
留連

毘陵道中

蘭舟載酒集高朋縹緲孤帆指義興平楚橋臨青
嶂曲晴空塔聳白雲層沙汀水落萍還積田舍秋
來黍漸登一局殘棋賓未散夕陽煙樹近毘陵

園亭夜宿

華屋三年別閒來一駐驂移樽同勝賞下榻恣幽
探林壑秋聲滿亭臺夜色含山牕燈火下相對盡
沉酣

蚤抵錫山

苦暑竟宵征歸帆拂曙星簾垂秋水碧坐對曉山
青徙倚看漁艇微吟到驛亭此身渾似寄滄海一
浮萍

柏瀆夜歸

天末夕陽收歸途只暝投揚舲過蠡澤失路問漁
舟雨暗湖天夜風生荻岸秋宵分方抵舍燈火映
青丘

湖州城下夜泊

清秋移桂檝薄暮宿苕溪雲磬來蓬底煙林隔水

西川原隨地勝星漢去城低欲訪山中舊前途候
蚤雞

宴座主董司空宅

司空愛客興何長芳宴時開綠野堂皓齒滿前歌
玉樹纖腰相對舞霓裳瑤觴頻勸人先醉銀燭高
燒夜未央歸臥蘭舟初夢覺羅襟猶帶酒痕香

晚過平湖縣東湖

薄暮風生訪戴舟湖波遙引太空流墟煙縷縷山
腰起塔影層層水面浮幾點閒鷗紅蓼晚一行新
鴈碧雲秋江鄉到處堪乘興莫怪明時便乞休

夜歸婁門

潮生荻岸平日暮蘭橈歇蓬底坐移時開簾見新
月

秋夜獨處懷內

天遠鳳樓空風清鴛帳冷不寢起憑欄月落孤松
影

秋晚虎丘山樓小坐

水國深秋景山樓薄暮時閒尋蘭若客同醉菊花
危草木行看變雲林似有期笙歌聲正沸歸棹未
云遲

蠡塘舟中晚眺

江鄉過雨晚蕭疎
霜染楓林錦不如
數里煙帆漁父棹
孤村水竹野人居
樽攜綠醕時浮蟻
囊解青錢欲買魚
菊有黃花秋漸老
臨風徙倚獨躊躇

初冬日園亭雜興

細雨園林潤
初冬景亦佳
蕉餘含露葉
菊剩傲霜花
古木臨寒水
高窗送晚霞
烹茶問童子
分火向鄰家

冬夜與諸友同集馮郡伯園亭分得栖字

名園冠蓋集
坐久忽雞栖
明月當空滿
晴雲去樹低
窗間銀燭剪
松下綠樽攜
到處清輝繞
歸途醉不迷

贈丁侍御同年赴南都三絕

滄江一棹駕長風
水底魚龍亦避驄
他日埋輪兼破柱
始知江海有孤忠

繡服霞明映麤冠
臺端今日用丁寬
先聲但落奸雄膽
莫遣霜飛六月寒

折桂當年並馬遊
君今攬轡氣橫秋
自慚空負澄清志
宦海歸來已白頭

與顧水部期登樓玩雪不赴簡一絕

彤雲萬里雪漫漫門外花飛玉樹寒欲上層臺尋
故約問君何事學袁安

除夕

百年已過半此夜歲云除消却風雲氣聊同水竹
居湖山原有社政府久無書元日來朝是春風到
草廬

艤舟靈殿寺與客同探梅花

澤國春陰久梅花尚未開疎枝含玉蕊清影落瑤
臺客舫移樽至僧廚進茗來不須催几席隨意坐
莓苔

送王少叅同年赴豫章

迢遞西江路花開滿故枝君懸新綬去予動舊遊
思彭蠡春深後匡山月落時夢魂飛度處雲水隔
天涯

雨後登城野望

雨歇天還霽沙乾路不迷亂鳩鳴竹塢飛燕掠芹
泥城帶春雲潤山銜落日低醉餘時縱目芳草綠
萋萋

雨後南園曉望

病酒連朝起較遲南園門掩日長時庭前草長多

新綠雨後花開滿故枝絲颺微風骨古木水流曲
徑到平池呼童爲整登山屐恐負幽人石上期

上巳前一日與客同集虎丘山樓

山樓攜客飲春色正堪憐壘嶂浮雲外明湖落檻
前松門斜映日花徑暗流泉欲掃千人石欣然一
醉眠

春日與客同過張幼于湖上別業

春風湖上駐藍輿言訪蓬蒿仲蔚居高閣過雲浮
棟宇匡牀飛雨潤琴書呼童頻進松陵釀對客時
烹笠澤魚繾綣從君還竟日倦遊誰惜病相如

春日訪方司訓二首

訪舊攜軒從山行一徑斜春風多柳絮夜雨長蒲
芽草滿王孫路雲深處士家憐君頭白盡潦倒臥
煙霞

不見方干久沉吟帶瘦容青山城市遠白屋薜蘿
封身向閒中老交從病後慵湖山風月夜安得更
相從

山牕獨坐二絕

日永篆煙消風寒襟袂薄閒牕無客來坐久庭花
落

夢
林合鳥聲頻
山含花氣重
春色已將闌
欲寢不成

上湖舟中

春遊興未已
一棹泛中流
塔影波心落
嵐光樹杪浮
岸花紅欲盡
汀草綠初稠
念此頻來往
壺觴共勸酬

早登拂水巖

肩輿侵曉發
一徑入中天
花落鶯聲外
人行鳥道邊
雲深低護石
風送亂飛泉
更上層巔望
雙崖若劍懸

山齋睡起

幽齋初睡起
斜日透窗明
簷外羣蜂出
花間一鳥鳴
微吟無限思
晏坐有餘清
點檢殘春色
凭闌詩又成

初夏日與社友同集蔣高涼宅

芳辰喜良晤
清酌坐花前
松竹開三徑
冠裳聚七賢
笑談娛白髮
醉眼望青天
別後林光暝
歸途細雨邊

新夏登虎丘山閣

山樓杯酒坐
移時醉倚闌
千日欲西芳草叢
深麋

鹿走殘花落盡杜鵑啼林藏宿雨枝頭重風壓輕
雲水面低遊客不知春已去畫船簫鼓聚香堤

贈吳少溪宮詹

海內賢豪士如公復幾人棄繻遊上國彈鋏客平
津意氣凌霄漢聲華動縉紳穆皇初御極潛邸昔
為臣晝日方傾藿秋風忽憶蓴煙霞堪自老風月
未全貧安石登山屐淵明漉酒巾竹林羣結社桃
實幾經春坐客金蘭舊庭闈玉樹新陶朱同晚節
方朔是前身人並推耆德時方禮逸民聖朝纁璧
詔早晚下楓宸

許墅新晴

雨歇芳林潤風生細浪浮河津當孔道關法阻行
舟斜日蒸花氣輕寒動麥秋自嫌嬰世網空負主
人留

河橋曉發

水村雞唱後曙色到蓬牕雲破猶隨月河斜欲墮
江乘風攜畫槳分火剔銀缸殘酒時消盡詩魔未
肯降

集徐鴻臚園林

雷聲起天末驟雨忽傾盆徑引奔泉落林樓斷靄

昏殘陽催去客暝色帶清樽醉拂羅衫袖淋漓半
酒痕

夏日園居獨坐

經時久不到山莊數畝園居野趣長窗竹日高斜
弄影庭花風動暗浮香書拋滿架呼僮帙酒熟盈
樽待客嘗獨坐更無塵慮擾蕭然真足傲羲皇

南樓雨坐

投閒登小閣獨坐倚雕闌簾幙千村雨絺衣五月
寒水聲來坐上煙景翳林端風灑侵窗竹圖書潤
未乾

南浦新晴散步

散帙尋幽賞園林過雨新菜畦微有徑苔石淨無
塵鄰犬時迎客池魚解避人壺觴隨意飲漉酒不
須巾

鷺湖雨後舟行

雨洗湖光淨可憐遠山湖外斂輕煙離披蘆荻疑
連漢浩渺蘭舟欲上天鳥逐帆飛明鏡裏漁收網
掛夕陽邊呼僮釃酒消閒坐散髮蓬牕一醉眠

毘陵舟中

向晚毘陵道官橋繫短篷水迎風起浪日射雨成

虹鬢逐年華白顏隨酒暈紅甘心老空谷一任笑
愚公

舟中望惠山

往返梁谿道開簾見惠山遙憐多勝槩恨不及躋
攀雲壑清泉冷松門白日閒狂遊今不倦極目只
空還

歸舟晚眺

侵星時鼓棹畢景未收帆日落煙橫浦天高月掛
巖多情新綠酒落魄舊青衫醉後清狂態憑誰笑
阿咸

常熟舟中

落日琴川路薰風彩鷁新煙波時獨往鷗鳥自相
親興豈同元亮狂疑類季真憑誰問行跡湖海一
孤臣

十三夜山亭玩月

華館中秋夜青天片月來彤弓弦未戩寶鏡匣初
開疎影穿簾幙清光落酒杯坐深忘却倦一任漏
頻催

中秋夜石湖舟中無月

湖上通宵坐中天月未明孤舟虛夜景萬籟自秋

聲竹葉沾還進燈花剪復生故人相對飲潦倒不
勝情

十六夜抵虎山橋

夙有山橋約今從煙水遊晴嵐浮列嶂落日漾中
流寺迫諸天晚湖懸一鏡秋相看明月上談笑理
觥籌

秋日與客同登靈巖二首

破曉登危巘行行入翠微琴臺松韻細香徑露華
晞地僻幽花吐池晴浴鳥飛投閒尋古跡竟日自
忘歸

靈巖攜上客石磴倩僮扶掬水臨雙井凭高瞰五
湖煙霞迷古洞霄漢插浮圖此地三年別重來興
不孤

家弟歸自秣陵攜酒同登虎丘

朝來烏鵲喜天畔鵲鴿歸挈客登高閣開樽對落
暉天香流綺席秋色上羅衣醉後回孤棹風帆一
片飛

澣野舟中與蔣雲厓郡守夜話

河梁同艤棹杯酒夜相親坐對青燈久還驚白髮
新煙霞三徑侶天地兩閒人故舊論心處相看醉

態真

秋日與蔣使君同遊黃公澗

登高行憩樹掃石坐聽泉林谷含秋色邨墟起暮
煙亭依青嶂曲酒送白雲邊飲罷天將暝歸舟醉
欲眠

蠡東秋夜

池館深秋夜寒蛩不住鳴涼颭千里至新月一鉤
明古壁殘燈影空堦落葉聲芸編閒檢罷獨坐有
餘清

秋晚南園二絕

亭俯曲池中人歸殘照裏夾岸芙蓉花盈盈隔秋
水

幽棲謝俗緣僻性耽清賞醉後步蒼苔東林月初
上

南園秋暮二首

甃爾塵氛遠居然心境幽遣懷頻覓句窮睇獨登
樓禾黍孤邨晚芙蓉夾岸秋自甘疎懶性清世愧
沉浮

搖落深秋後淒涼欲暮時印堦多鳥篆網戶總蛛
絲竹圃風聲集蕉庭日影移時逢攜酒伴相與醉

東籬

雨後晨起即事

臥聽中宵雨仍驚十月雷
晨光時漸動寒色曉來催
試檢狐裘在慵將鸞鏡開
科頭清旭裏獨步思徘徊

送長洲李明府入覲

作宰君當英妙時政成應報九重知
雲中宮闕雙鳧遠客裏風霜一鶴隨
紫陌朝回煙未散彤庭宴罷日初移
自來卓異堪殊賞借寇能忘竹馬期
與袁太常顧水部蔣郡守同登徐鴻臚後苑

層樓

叢林架層閣縹緲插青天
遠送千山雨平吞萬井煙
杯傳殘照裏人醉白雲邊
賢主時邀客頻來下榻眠

冬日舟過蠡西

仲冬風日好天氣更宜人
霧散林初霽霞明水欲春
帆移青雀遠村狎白鷗
馴故舊時相迓樽前意味真

夜過蠡西竹梧書院

當年讀書處今日喜重過
拂樹霜華重穿簾月色

多興同狂阮籍迹類病維摩醉向孤燈坐淒涼奈
若何

醉歸東齋

醉歸天漸暝野燒映寒原委巷兒童候叢林鳥雀
喧燈花落書案風葉走柴門自喜身閒曠那能效
檻猿

竹梧軒晨起

夜飲歸來晚晨眠起較遲日高煙未散春入鳥先
知自覺心如水寧言鬢似絲疎狂時共棄獨樂復
何疑

東樓小坐

高樓瞰玄圃杯酒坐移時煙景翳林杪春光上柳
枝窗虛雲滿棟冰泮水平池夙有清狂興臨風一
解頤

早春與客同過張幼于曲水別墅

尋梅往南郭因過辟疆園奇石風霜古長林竹樹
繁高情追梓澤痛飲效平原客散宵分後空餘月
滿軒

蠡東別業閱壁間鄭侍御詩愴然書感

谷口人何在緘題手澤存青年棄軒冕白社共琴

樽身退名還重家貧道自尊修文竟成幻無處可
招魂

月夜舟次吳塔與顧陸二丈酣坐

扁舟載月艤林臯故舊相逢盡濁醪坐擁黑貂青
露重行看玉兔碧天高惟當佳景攜三益肯向衰
年歎二毛曠達從來說嵇阮竹林還許醉山濤

陳氏湖田別業晚集

攜酒臨山閣杯深客漸醺湖心淹落照樹杪度春
雲風急鴉羣亂山高鳥道分歸途無醉尉誰詰李
將軍

過湖上友人別館

園林幽勝傍湖鄉春雨初晴草樹香落盡梅花無
客看柴門深閉陸渾莊

春日游石湖因登張幼于浮黛樓

危樓時縱目物候向春融孤黛浮天上明湖落掌
中牕虛含宿雨簾動引微風坐久渾忘去凭闌夕
照紅

稽范堂懷張幼于

范相幽棲處風流幾百年清芬遺後代華構景前
賢夜送吳山月晨分笠澤煙何時共公子歸老石

湖邊

春日郊居遣興

春來江上景偏幽草木欣欣雨乍收
花徑風微黃蝶舞萍池水長錦鱗遊
自憐綠野今為主誰識青門舊是侯
杯酒爐薰消日月閒心總爲白雲留
春城送張幼于遊錢塘兼寄張水部德夫
胥江春水漫城陰詞客乘春去武林
三月風光湖上好六橋草色雨中深
年來夙有青山約別後應多白雪吟
花下若逢張水部爲言予已二毛侵

曉發婁江將訪王棘卿元美

曉風吹片雨篷底作輕寒煙草連天去
江花帶露看幽偏勤簡帙離索懶衣冠
訪舊還探勝扁舟興未闌

春日過王棘卿園亭二首

摩詰幽居後藍田別業新園林三徑曲
花木四時春日有攜琴客時多問字人
頗容疎懶性一室願爲鄰

紺園春欲暮光景入繁華雨後多芳草
風前自落花攢峰危柱石曲水爛蒸霞
未盡登臨興西林日已斜

春郊散步

江城春雨後綠水映晴沙緩步憐芳草多情恨落花衣沾香霧重絲颺暖風斜興到尋遊伴前邨問酒家

春水舟中小飲二首

撥棹春波綠開簾夕照紅杯傳新荻渚人醉落花風縱飲情何劇狂吟句自雄衰年謝軒冕放浪一漁翁

攜榼聊同飲回舟已半酣煙雲花外繞天水鏡中涵宦海風塵遠江鄉趣味諳疎狂時共棄嘯隱大

江南

後苑牡丹盛開與諸公同賞分韻得杯字

名花嬌豔雨中開把酒臨軒待客來繡幕香浮青玉案雕闌光映紫霞杯殘春去夏無多日老景看花得幾回且向樽前共歡賞莫教零亂委蒼苔

自雲間過嘉善訪金明府不遇

停橈夜聽華亭鶴放棹晨披樵李雲日暮孤帆天際落路迷何處訪神君

園亭雨後即事

別墅紅塵遠幽居日掩門松聲醒客夢鳥語類人

言籬落斜通徑溪流曲抱邨池亭梅雨霽獨坐向
黃昏

送蘭溪金明府赴召北上

送君馳驛去江上雨初晴一鶴同琴往雙鳧拂棹
行掖垣新視草花縣舊知名聞說朝陽鳳偏從盛
世鳴

獨酌

雨洗長天淨霞飛落照明行看秋色遠坐覺晚涼
生獨酌聊乘興幽棲不用名醉吟空向夕四壁亂
蛩鳴

送楊大叅同年赴粵西二首

秋風江上動雙旌遠駕星輶嶺外行夾道兒童笑
相語秋江應讓使君清

日落煙江路欲迷望中一片白雲低使君心與雲
俱遠萬里隨風到粵西

送闕儀部之饒州

曉向金閭折柳枝臨行贈別意遲遲欲知別後相
思處夢斷匡山月落時

獨坐

孤燈明滅夜迢迢獨擁寒衾酒漸消階下蟲吟和

露切牕前葉落信風飄百年已悟塵棲草一夢猶
驚鹿在蕉老去自憐精力改帶圍應減沈郎腰

悟石軒待月歸舟漫成

悟石軒中竟日留坐聞仙籟引篴篥蒼煙晴帶諸
天暮丹桂香含一壑秋醉喜微風生短袂歸看明
月浸虛舟每逢佳景偏多興狼籍杯盤夜未收

蠡東漫興

澤國秋將盡柴荆客到稀鴈歸楓葉改雞豚稻梁
肥滌器催盛酒敲砧擬授衣山林興成癖甘與世
相違

塘灣舟中夜雨

山雨暮來急蓬牕夜臥遲簫聲雲外落燭影席間
移共醉黃花酒應多白雪詞因悲名利客潦倒在
天涯

送曾鴻臚歸豫章

握手臨歧把濁醪送君千里去江臯清霜曉拂張
華劔朔氣寒生范叔袍彭蠡帆收山月上匡廬雁
度楚天高相逢不久重為別兩地應知夢寐勞

送徐明府赴海陽二首

送子潮陽去星軺度嶺雲當官應有法飾治更須

文海近烽烟接城臨島嶼分欲知新製錦試問小

馮君

馮乃舊令

族本衣冠舊腰懸印綬新雙鳧飛遠道匹馬逐輕
塵月照琴堂夜花明海縣春政成歌頌起坐見鱷
魚馴

許墅道中

天末長風發孤舟送上溪鷗羣衝浪起鴈陣入雲
迷林帶荒煙暝山銜落日低蟹螯空薦酒痛飲醉
如泥

舟中偶述

度臺遊倦即歸畊蹤跡渾如水上萍遯世何須歌
白石養生惟喜誦黃庭詩當月下偏催和酒向花
前不放停自是江鄉容傲吏許誰遙應少微星

夜宿山家

車馬勞勞日已斜僕夫指引到山家園蔬細摘時
頻進村酒新筍不用賒片月近人寒弄色孤燈對
客夜生花山翁醉問家何處慚愧吳門學種瓜

曉行入山

曉別山翁去星河壓嶺低亂岡頻駐馬數里未聞
雞殘月和煙沒清霜使徑迷仙家行漸近徐步躡

丹梯

晨登大茅峰

肩輿涉險到仙源一路泉聲入耳喧巖畔蒼松千
歲古洞前瑤草四時繁龍潛幽壑生雲氣龜斷荒
碑積蘚痕便欲飄然避塵世採芝何處訪東園

夜宿崇明寺舊寓

二十年前逐隊行重來蕭寺不勝情入門寒月侵
階白俯檻浮雲與塔平燈下漫傾新貰酒壁間還
認舊題名夜寒禪榻淒涼甚一枕黃梁夢不成

南都歸途中作

整裝晨向板輿升物外雲遊近類僧浪跡自同狂
北阮微行誰識舊東陵吳中別業應歸去白下名
山惜未登非敢清時即長往依違恐負丈夫稱

虎丘訪僧不遇

停橈徐步扣禪關門掩松陰白日閒坐對寒雲時
悵望蕭條落葉滿空山

南樓曉望

曉向南樓望陽光動綺疏蛛絲盈几案鳥跡汗琴
書曝背難爲獻閒心只自如仲冬風日好聊此稱
幽居

送王大叅同年南還二首

當年邂逅大江濱策馬看花上苑春
宦轍從來途路險故鄉歸去歲華新
東風舊宅仍栽柳細雨芳洲更采蓴
別酒莫辭頻勸飲與君俱是倦遊人
江城送客日西斜一片孤帆去永嘉
澤國舟中無蕙苾官橋雪後有梅花
故人惜別重攜手遊子先春擬到家
鍾鼎山林俱夢幻好將詩酒弄煙霞

郊居晨起即事

郊居時晏起寒色動柴門
日出雞豚散庭空鳥雀喧
斷煙棲木杪殘雪擁籬根
曝背南簷下狐裘漸

覺溫

山行口占

湖鄉歲晚倚蘭橈山背陰陰雪未消
閒向官橋時問信春光先露早梅梢

月夜渡湖過虎山橋

一葦風生過五湖山橋此夜月同孤
天浮皓魄連銀漢波漾流光注玉壺
荻渚漁歌時互答沙汀鴈宿自相呼
優游物外渾無累且覓高陽舊酒徒

元日

元日還新霽東風上柳條
遠山嵐半吐積水凍全

消寶鼎香焚柏金樽酒頌椒衰年逢令節清興覺
偏饒

送王古菴侍御之夜郎

金閭門外柳條春客旆悠悠指去津江畔寒梅迎
棹發天涯芳草映袍新憐君舊是烏臺使老我今
爲白社民別酒臨行須強飲雲山萬里共誰親

閒過靈殿寺看梅

古寺荒涼煙景賒竹林深處是僧家老梅不識寒
暄態依舊春開幾樹花

春日攜榼同顧陸二文學往北寺野望

雙樹尋芳坐孤梅發興新日斜幡影墜春入鳥聲
頻陌上韶光動樽前趣味真年來逃世網偏覺故
人親

晨起

何處雞聲枕上聞碧紗窗外曙初分庭花欲發含
朝露海日將生散曉雲解組久同南郭隱守株無
愧北山文殘生病後堪行樂不羨區區竹帛勛

病起小齋即事

不到名園久春殘花事稀林香還入坐草色欲沾
衣喬木干青漢層臺落翠微平生耽勝賞日暮竟

忘歸

夜宿山房

客座傳杯罷禪房借榻眠小樓青嶂曲高枕白雲
邊寶刹諸天近瑤臺片月圓幽棲塵事遠積久足
延年

月下與客同步

散步千人石鐘鳴夜未闌雲歸山閣暝月浸劔池
寒花氣侵衣薄松風吹酒殘病餘難久立長嘯倚
危闌

山房晚坐

山中初病起三宿遠公房避俗尋蓮社全生禮藥
王泉流穿澗冷花落染塵香對此逍遙坐將迎意
盡忘

山房曉起簡同遊諸君

無端夜雨五更寒紙帳聞雞客夢殘松籟風微還
入座花陰日上漸過闌漫言桑下逾三宿還喜樽
前聚二難乘興忘歸君莫訝萬金那易一身閒

後苑層樓登覽

高閣連雲起層軒逼水開簷前芳樹遶座上遠山
來景向春城聚詩從暮雨催家園增勝槩竟日此

徘徊

立夏日後苑漫題

倏忽流光春又徂朝來病骨強支吾輕煙風颺時
高下細雨雲移乍有無深竹鶯遷簾外語平湖鳥
下鏡中呼景隨物換留無計斷送餘生酒一壺

初夏南園雜興一首

南苑逢初夏薔薇滿架花幽香微帶雨麗色爛蒸
霞地擬東山勝樽開北海賒謝公行樂處沉醉岸
烏紗

夏日過劉秀才邨居

訪舊青郊外停舟綠水濱景臨初夏日情是故鄉
親杯酒論文久園林發興新相看頭盡白來往莫
嫌貧

無錫城下夜泊

沙洲維畫舸獨坐向黃昏月委溪流湧風隨麥浪
翻烏棲城下柳犬吠水邊村心事憑誰語惟須酒
一樽

與客同登吳氏園樓

高閣憑闌坐川原一望分庭花晴媚日林木上平
雲山色侵牕入鳩聲隔竹聞論文兼話舊不覺酒

微醺

晚發岳亭

客路通宵雨，河橋柳色青。
水深新荻渚，煙暗古郵亭。
對鏡冠慵整，凭闌酒未醒。
年來困塵網，華髮漸星星。

毘陵道中二首

揚帆初雨霽，縹緲向毘陵。
雲斂山仍出，沙虛岸欲崩。
渚花迎雀舫，堤柳掛魚罾。
歸路梁谿近，名山擬共登。

路出晉陵西，城懸落日低。
鷗驚漁棹起，烏向女牆棲。
水竹由來美，煙花望欲迷。
因思漆園吏，吾道付醯雞。

南園散步

向晚開三徑，薰風洒客裳。
修篁新脫粉，幽草暗生香。
水溢羣魚泳，林深百鳥藏。
閒來觀物理，不覺意俱忘。

郊居口號二首

嬾性優游鹿豕羣，閒將杯酒對南薰。
醉來高臥北窗下，松竹蕭蕭鎖白雲。
課僕晨畊負郭田，坐憐喬木午參天。
也知冠蓋京

華客輸我林間一醉眠

送馬大叅同年北上

一片征帆帶夕暉官橋煙柳暮依依別時紅蓼迷
江渚到日黃花滿帝畿命下喜生毛義檄夢回驚
覩老萊衣知君才力猶強健肯向明時暫息機

吳江訪李中丞晚歸二首

訪舊攜孤棹江城落照紅暮林投倦鳥秋水偃長
虹燈起荒郊外帆飛細雨中三高不可作千載仰
遺風

畫船時載酒銀燭夜生花老去身逾嬾秋來興每

佳朗吟歌白雪沉醉岸烏紗舟子兼程進更深未
到家

琴川夜歸

百里琴川路扁舟載月歸揚帆凌皓景把酒弄清
輝山斂孤雲盡河懸列宿稀更闌人醉後露下濕
荷衣

夜泊太倉城下

醉向篷牕臥悠悠夢未成一簾秋月白孤枕夜濤
聲夙有江湖興難忘魚鳥情漏催天易曉隔水又
雞鳴

松江道中

水鄉溪屈曲蘆葦晚蕭蕭歸鴈衝殘雨行舟趁落
潮新詩時易就宿酒未全消前路多村店青旗映
畫橋

秋晚過西山別業

艤棹臨湖曲穿雲過嶺西亂蛩吟露切歸鳥度煙
迷天斂殘霞盡峰懸落日低山齋行欲到分火借
青藜

天池道院小坐

名山深窈窕池引細泉分樹倚將崩石峰留欲去

雲幽軒含積翠古桂送清芬痛飲渾忘去微風酒
漸醺

贈孫將軍岐陽

將軍不武類能文籍籍芳聲藝苑聞策蹇行吟松
徑月枕書高臥石牀雲看花酌酒秋將暮剪燭彈
棊夜未分寄我新詩總珠玉山堂日日挹清芬

贈張幼于訪舊

幽棲常傍白雲眠乘興時登訪戴船舊約喜從千
里去新詩應擬萬人傳滄江水接天俱遠采石秋
高月正圓知向故人歡會處桂花香落酒樽前

蠡東別墅

籬落三秋景柴扉一徑通
浩歌驚宿鳥徐步聽寒
蛩橘柚霜前綠芙蓉水際紅
無官真散逸何必悶
書空

九日與客登上方流雲亭

選勝登危巘攀躋未憚勞
兩山浮水出孤塔插天
高湖色分漁艇林香入客袍
日斜人醉後轉覺興
陶陶

蠡溪秋夜

一池秋水浸芙蓉荒蘚如裊
草徑封平楚雨收煙

慘淡長空雲翳月朦朧欲逃塵網同孤鶴閑向立
樊愧伏龍寂寞山窗燈火夜樽前嘯咏任疎慵

孟冬日南苑即事

窮日牽塵鞅因耽別業幽園林開綠野臺榭俯清
流落葉飛還舞閒雲去復留地偏心境寂無語倚
南樓

晚過王宴嶺

山行逾數里一嶺界天高壘嶂全封蘚叢林半是
蒿雲歸迷鳥道風起沸松濤向晚回孤棹行廚進
濁醪

夜宿江樓

欲覽仙巖勝，遙從江上行。
小樓春月色，孤枕夜濤聲。
竹葉消愁盡，梅花入夢清。
來朝潮正長，風送一帆輕。

八圻夜泊

笠澤停橈處，村醪不醉人。
樽前燭影墜，岸上柝聲頻。
漸覺家山近，休嫌客路貧。
夜來風雨急，疑是妒芳辰。

上方流雲亭小坐

日浴湖光淨，山含秋氣深。
白雲迷古寺，黃葉墜疎

林。水送亭中色，峰移石上陰。
相逢此佳景，杯酒醉還斟。

寄徐大叅同年二首

曾向長安步後塵，倦遊歸臥五湖濱。
雲林自喜能容我，宦海從來可畏人。
一枕黃粱真是夢，數杯綠酒易爲春。
百年光景今過半，贏得逍遙物外身。
畏途日日起風波，寄語君侯奈若何。
黃雀銜環誰復有，青蠅玷壁古來多。
射工沙際窺人影，魑魅山中喜客過。
須識此中真險惡，還家嘯傲舊煙蘿。

早春日晨起遣懷

斗帳孤眠怯曉寒起看紅日已三竿誰憐病後腰
肢小自覺閒來心境寬柳色弄晴煙未散梅花破
冷雪初殘從教春滿西郊外繞路芳菲簇錦鞍

早春日自遣

東風披拂凍全消漸覺煙光動柳條病後未須拋
藥裏春來還喜整蘭橈山中蘿薜原相約湖上梅
花早見招自分逍遙謝塵鞅但將詩酒過清朝

春夜

病骨偏宜睡呼童早閉門孤燈侵夜短薄絮向春
溫雨翳鐘聲杳風驚犬吠喧誰憐漢司馬今已老

文園

徐少叅宦遊初歸賦得東園春奉寄

江城佳勝在名園花木逢春各競妍鴨綠波光浮
麗日鵝黃柳色弄輕煙遊人久許攜樽過舊客還
容借榻眠寄語初歸東道主暫時相賞是良緣

上巳日雨坐遣懷

上巳多風雨蘭亭興已違春寒增寂寞煙景入霏
微草色閑侵慢苔痕欲上衣登樓時徙倚點點暮
鴉歸

琴川道中

虞山不到已經年此日登臨破暝煙沙岸人行殘
霧裏水村花發夕陽邊白頭漸覺交游少青眼還
應故舊憐夜向蓬牕還起坐一方明月滿琴川

南園口占二絕

池臺久雨後芳徑生新草閒上畫樓看牕裏青山
小

小亭蒼翠繞與客坐移時花落青春暮枝頭叫子
規

暮春日蠶東對客遣興

抱病江鄉過客稀春深白日掩柴扉樽前愛坐山

當戶醉後何妨酒滿衣飛絮池塘魚競出落花庭
院燕初歸來朝不淺登臨興著屐穿雲入翠微

病中口號

雨後花香入院清閒來心境絕將迎一庭修竹紅
塵遠竟日唯聞鳥雀聲

失編

和顧東白同卿歸田倡和集原韻

九重綸命下公車得諫東歸意自如青瑣當年同
仗馬碧山今日復焚魚三竿紅日堪消酒半榻清
風稱讀書更羨臨行投贈者陽春欲和愧瓊琚

金陵下第東歸

石頭城下竝孤舟千里關山汗漫遊行色
匆忙書劍冷西風蕭颯鬢毛秋疎林黃葉
連天思古驛寒花滿目愁三載相期只如
此忍看蘇季黑貂裘

雨後中庭夜坐

槐庭秋雨霽正是納涼時雙闕銀河近
千林玉露滋興隨清夜發坐爲好風移
此意無人解唯應達者知

挽朱秀才良玉

蚤歲相知筆硯同中年岐路各西東
青雲愧我身

先達白首憐君志未終蕙帳徒懸秋
月冷酒杯應向夜臺空臨風無限淒涼
思腸斷荒煙落日中

贈楊道衡姊丈

當年同學在庭闈中歲離羣一鴈飛
愧我風塵偏易老羨君林壑又知非
玉桃薦酒娛珠履金勝傳春映綵衣
共對南山頻勸飲不妨明月繞柴扉

宿上宮吳道士太虛樓

太虛樓閣倚層雲檻外三峯掛夕曛
嵐合香煙千樹暝風飄仙籟九天聞
初晴簾幕懸烏影向晚松楸下鶴羣
更喜慇懃吳羽客相隨月下禮茅君

山中贈楊勺泉道士

仙壇久著鍊師名，鞭撻風雷宇內驚。
勺水休將容易看，曾爲霖雨濟蒼生。

哭金秀才

月落江湖夜已闌，故人別後見應難。
西風吹散清宵夢，腸斷霜天雁影寒。

悼鶴

雙鶴原從海外來，幽軒日日步蒼苔。
未能振翮凌霄漢，相繼游魂赴夜臺。
雲暗江樓何處覓，月明華表幾時回。
憑闌悵望西風下，零落霜毛真可哀。

戲爲柳枝詞贈別二首

岸頭柳色近鵝黃，絲短那堪別恨長。
寄語東風休作態，天涯到處斷人腸。

東風昨夜消殘雪，弱柳絲絲漸堪折。
上林春色自多情，莫向河橋頻送別。

濠梁雜詠六首

紅羅浮水產真人，崛起平將六合吞。
掃蕩腥羶歸禮樂，朗然別是一乾坤。

元末英雄角逐時，真龍猶未出天池。
諸艱歷盡天方授，一起時將大難夷。

豐沛濠梁俱帝鄉盡憑三尺定封疆本朝自用周
官制不似炎劉雜霸王

河山形勝昔中都佳氣千年擁帝圖多少金陵騎
馬客當年曾此効工徒

彭蠡塵兵勢頗窮韓生狗節意何忠那知漢室論
功日不錄滎陽紀信功

破曉馳驅驛路來沙邊立馬自徘徊英雄千載今
誰在淮水東流不復回

鯤溟先生詩集卷四

鯤溟先生奏疏

應詔條陳銓曹事宜疏

隆慶元年

吏部考功清吏司主事郭

奏為酌處銓曹未

盡事宜以隆新政事竊惟人君代天以理萬物故
謂之天子吏部代天子以統百官以治萬國故謂
之天曹凡吏部職掌諸有功者當封而無功不得
以冒膺有德者當爵而無德不得以濫與賢能而
勤慎者則與天下共陟之不肖而鰥曠者則與天
下共棄之此皆秉至公以求夫至當一惟奉若乎
天道而已匪惟吏部不得而私之雖天子亦不得

而私之者也惟不得而私之故所為悉出於至公而歸於至當其斯以為銓衡歟恭惟我皇上以仁聖之資紹帝王之統遵奉遺詔聿登大寶自即位以來毅然以勵精圖治為念凡所設施動合成憲一時祛邪歸正興利除弊進賢斥不肖諸大舉動悉皆次第行之二三月間朝堂之上固已肅然改觀而海內亦方且欣欣然想望熙皞之盛矣然其間猶有未盡事宜所當議其因革者除不係吏部職掌臣不敢越職陳論外至於封爵官職考覈進退此皆臣等職內事也安可引嫌避怨而緘默不

言乎臣待罪銓曹常欲勉修職業以圖報稱故敢即本部合行要務分為八事陳列於後伏乞聖明俯賜採擇俾得見諸行事庶臣一得之愚少有裨於九重之聽而所以翊贊維新之化者在是矣一曰闢異端之教竊惟孔子刪述六經垂憲萬世其功直與天地相為悠久故歷代尊崇之稱以先師重以封爵而使其子孫得以世襲至我國朝其禮益加隆焉無非所以崇儒重道酬德報功也至若所謂正一真人者彼何功德而亦與世襲之典乎臣嘗稽之史傳惟後漢有張道陵者入山修鍊後

其徒以五斗米爲民祈禳因聚衆生亂世謂之米賊此其張氏所出之自也歷漢唐宋以及今時曾未聞有功德於世而乃加以正一秉教大真人之號其子孫亦得世襲時或賜以飛魚服色及玉帶等物儼若與衍聖公孔氏並列者夫使張氏而果有功於世教則尊之重之而聽其世襲可也今也旣不能却病延年而上有益於人主又不能禳災息患而下有利於生民徒使黃冠異流世膺誥命之重白丁豎子濫叨名器之榮此其不經甚矣臣前任江西親履其地因知張氏子孫率多縱肆荒

淫若張永緒者身爲真人乃以酒色夭死是其人固非真矣惡在其爲正一秉教乎哉即今永緒無嗣此天意欲使異端熄滅不以累我皇上文明之化耳况永緒之與陶仲文一也仲文諸人旣以置之顯戮張氏之子又安可使獨受顯秩乎臣聞永緒一枝雖絕而所遺貲產尚百餘萬則其旁枝將必有懇求襲封者矣伏願皇上獨奮乾剛尊崇正道不爲異端所惑勅下吏部再加詳議如果臣言不謬即命削去正一秉教等號不許世襲如從寬處或止以提點住持奉祀可也如此則名器不至

過濫異端日熄而正道益隆天下萬世之下咸仰
大聖人之所作爲矣二曰節外戚之封嘗聞漢高
立白馬之盟非有功則不侯世祖表雲臺之績在
外戚則不與若此者固所以重武功亦所以防僭
慝也我國家之制惟開國靖難諸勲及凡疆場汗
馬之勞擒王斬將之烈方得世襲公侯伯爵曾未
聞有外戚之封而亦世襲者也近嘉靖年間皇親
陳萬言以孝潔皇后之父封太和伯然伯止其身
至其子陳書則惟降襲錦衣指揮耳惟皇親蔣翰
以孝慈獻皇后之弟封玉田伯而其子蔣榮得以

世襲皇親方銳以孝烈皇后之父封安平伯而其
子方承裕亦得以世襲此皆先帝一時特旨初未
可與開國靖難諸勲比也邇者我皇上登極之後
推恩外家若杜繼宗李銘陳景等俱以外戚傳旨
止各封以伯爵曾不許其世襲朝野傳頌咸仰聖
明以爲施恩有節也然臣猶以蔣氏方氏二伯世
襲尚覺有未安者當議有以節之陛下若以先太
后之故不忍遽加裁削乞查國家處宗室之制比
例言之夫宗室自郡王以下若將軍中尉之封皆
以次遞降則夫外戚封爵獨不可以遞降乎伏願

皇上以義制恩凡外戚之封皆議如宗室之制其始封爲伯再世降爲指揮又再降爲千戶百戶如今陳萬言之後陳書是也若不裁處蔣方二伯世襲則在陳書亦將援二家之例而陳乞世襲矣異日杜李陳三氏又將援前例而陳乞世襲矣夫我國家卜世無窮若外戚之家各許其世襲則凡無功而伯者殆將無所紀極又何以勸天下之武功哉况外戚之盛甚非國家之利昔漢世王氏五侯同日而封是日黃霧四塞遂兆漢氏中葉之禍然則今日之處外家安可不思所以樽節之哉伏望

勅下吏部再加詳議如果臣言不謬乞將蔣氏方氏二伯議各遞降其他外戚之家本身歿後並不許陳乞世襲著爲令典載在天府如此則朝廷之處外戚旣不失夫親親之仁又不失夫樽節之義而人亦不敢妄萌覬覦之心矣三曰正通喪之禮竊惟魯爲秉禮之國而孔子乃禮義之宗天下後世之言禮者必稽諸此也故漢武欲用孔臧爲御史大夫臧請願爲太常以遵守夫典禮前史美之夫孔氏自漢唐宋以來世主往往加禮至我國朝而世封爲衍聖公秩以一品若此者正以聖人之

後爲能守禮以表率天下之人耳夫何孔氏邇來
自同武弁之流至遇父母之喪不行丁憂即請承
襲者此不特在孔氏之自處爲有悖於祖先之訓
而在朝廷之處孔氏亦未得夫典禮之宜蓋三年
之喪天下之通喪也禮孰有大於此者孔氏爲聖
人之後而不使守三年之制其何以責天下且彼
武官之不丁憂者謂其有軍旅之寄也若衍聖公
之在魯其果亦有軍旅之事乎縱使有之在魯之
先世伯禽嘗墨衰以即戎矣今無故而不使守制
此其失禮孰甚焉况我皇上近居先帝之憂凡厥

禮儀悉命禮官講求經義遵守祖法務使上下內
外大小之間罔不如禮是將以孝治天下也詩曰
孝子不匱永錫爾類今皇上旣以大孝居喪則當
推此以錫天下使人人同歸於孝可也曾謂孔聖
之後而可使之陷於不孝乎臣願勅下吏部議令
衍聖公自今以後凡遇父母之喪定遵時制丁憂
起復一如文臣母得復蹈前過如此則大禮復而
表率有地大孝行而感格無窮庶我皇上以孝治
天下之心亦可垂訓於萬世矣四曰正冒濫之官
孔子曰惟器與名不可以假人蓋名器所在國家

之體統係焉名器濫而體統亦因之以褻矣我國
家設官自三公以下其次則莫重於六部卿貳又
其次則莫重於太常鴻臚等寺諸卿故在廷則班
列諸司之上出外則身享輿從之奉而祿秩之厚
服色之華俱非庶官之比此於名器亦重矣夫何
邇年以來徐杲一匠工也而列銜尚書王槐師宗
記皆異途也而列銜侍郎蕭瀾高復春等皆昏眊
鄙夫也而或為正卿或為少卿名器至此不既濫
乎頃遇皇上聖明已將徐杲問斥為民在師宗記
又因御史王得春論初下部議處名器駸駸乎正

矣然臣愚以為不特宗記一人所當議斥者若王
槐何功德而列侍郎蕭瀾高復春等何賢能而叨
卿秩况太常鴻臚等寺皆朝廷禮樂之司須擇儒
臣中平日德望隆重禮度安閑者使居卿位庶為
無忝若以祀典朝儀在宗記蕭瀾輩頗能習熟亦
宜為限制位止寺丞可也至於正卿少卿則豈可
使此輩為之且通政司職專出納其儀度聲容務
在得人猶之二寺也今通政司叅議等官既皆選
一時文臣為之頗為稱職何獨二寺之官不可使
文臣為之乎伏乞勅下吏部再加詳議如果臣言

可行合即遴選儒臣使居卿位其王槐師宗記蕭
瀾諸人宜革去侍郎寺卿等官惟使之協司管事
以後此輩三六九年考滿例應陞秩者定制不許
過寺丞其寺丞而上又該陞者止許加俸不許陞
職如此則京堂大臣不至使匪人得與而名器既
重體統亦尊矣五曰均內外之補竊惟五臣岳牧
並重於唐虞召伯吉甫出入於將相是官有內外
莫非王臣故在漢則自刺史二千石徑轉九卿以
至作相是外而未嘗不內也在宋則自宰相臺省
出判外郡是內而未嘗不外也我國家在祖宗時

亦有從教職而名補翰林科道者有京職而出補
外郡牧守者初未嘗拘拘於京堂之補也何邇年
以來人情上下悉重內而輕外其翰林吏部科道
四衙門等官尤為拘泥太甚故有自編修陞副使
而告病不赴者矣有自給事中御史陞方面而交
章稱屈者矣又有自吏部司官陞方面而外必見
疑於人內必不安於心者矣若此者是皆以京官
為清要而可以坐致公卿以外官為疎逖而不免
轄隸撫按至於盡職圖報畧不知講是豈人臣所
當自効之義哉故臣愚以為翰林吏部科道等官

其才望雖美不妨剔歷中外以練習乎庶務方面有司教職等官果才德出衆無嫌不次內轉以黼黻乎皇猷其自內補外而聲華愈茂者即當仍舊召用毋終棄之外方其自外轉內而聲名稍損者復從公議處毋專惜乎體面至於翰林之官尤爲儲養相材之地一或乏人務博選各衙門及外官中之德器端重才猷通練文學優長者兼補不必拘拘於庶吉士中可也若吏部科道一時員缺亦當互相改補或科道而才德穩重操履清嚴者即改吏部吏部而正直敢言風裁難犯者即改科道

惟其人之克稱何官則當推補矣必以衙門常套拘哉伏望勅下吏部再加詳議如果臣言不妄乞即從實舉行其在京各衙門官先從吏部始在吏部各屬官先從臣始臣今資俸尚淺姑俟將來量授外郡爲諸司倡庶諸司不以外補爲嫌而人思奮勵其爲陛下撫疲民固邦本者不患無人矣六曰精考覈之典竊惟虞廷明試以功未嘗獨詳於外職而漢魏考課之法亦未始偏略於京官也我國家之制在外官則三年一考在京官則六年一考因而黜陟幽明其立法之意非不合內外而兼

重之也但外官歷有合於上司考語到部其人之賢否似略有據故外官之考斥者十常得其八九何也有所憑據故耳若乃京官考察則既無考語之可據而惟採訪於一時之風聞其在部院當事諸臣非不持公心以求實蹟顧所問者雖出於公而所答者未必無私間或參以愛憎毀譽焉又或假以報復而行其私者則賢否之得實者鮮矣即如近日京考在部院諸臣雖誓心竭力以求稱塞而言者紛紛不免有傷大體良以無所憑據以塞其口故耳然則與其採擇於風聞不若取憑於考

語與其取辦於一時不若歷稽諸衆論臣愚以爲兩京各衙門官員今後宜令掌印官從公取其各屬賢否實迹每年終類送吏部都察院以憑稽考其吏部都察院屬官及六科給事中悉憑部院堂官各取具考語互相封送稽考至於翰林則憑掌院學士太常光祿鴻臚等寺及太醫院行人司悉憑禮部堂官太僕寺五府首領各衛經歷五城兵馬則憑兵部堂官帶俸中書等官則憑帶俸衙門掌印官各取具賢否事實類送部院其所送考語或徇私不公或避怨不實則考人正所以自考也

而其人之心術風裁亦自可見定宜以不職論矣
臣願勅下吏部都察院自後輪該京考年分預將
各衙門歷年考語從實稽考更兼以臨時採訪單
開姓名事迹互相叅覈如此則失之於訪問者或
得之於考語不得於一時者或得之於平日庶乎
賢否得實在考人者既不至有漏網之虞在被斥
者亦不至有向隅之恨而朝廷之上或可免乎近
日之紛紛矣七曰行就近之轉竊惟方面官負所
以鎮理一方而撫戢萬民其職固甚重也是以本
部遇有負缺必選擇資望相應者准擬二人候旨

點用方行銓補其事亦匪輕矣但人之常情既得
遷轉之便不無內顧之私每於離任之後多至枉
道歸家雖嚴爲限禁亦終莫之顧夫海內輿圖甚
廣各省相去道里頗長一往返之間在本官則耽
延歲月而職任不免於鰥曠在沿途則供應夫馬
而驛遞不免於騷擾且兩司體勢頗尊其所過府
州縣官自廩餼外又有交際飲宴餽送下程等費
往往多取辦於里中庫役者臣前待罪外官蓋嘗
親見其事矣故臣愚以爲今後兩司方面員缺即
於本省中推補或本省乏人必不得已乃於鄰省

中推補若浙江之於江西湖廣之於河南是也其
一面推補一面將本官咨憑勅印差人齎付該省
撫按衙門嚴限督令到任至於本官違限重則量
行降調輕則罰俸幾月如此庶人心知警不敢枉
道還鄉在本官既得及時供職而在地方又可免
於應付之繁誠為兩便八曰重久任之法竊惟守
令最為親民之官其人之賢否一方之民命係焉
擇之固不可不慎而任之尤不可不久也蓋民風
土俗必久而後知官法人心必久而後信昔若子
產治鄭張詠治蜀悉以久而成效有足徵也我國

家自祖宗以來其於守令之官亦嘗加意於久任
矣故徐瓚守蘇州以六七年而徑陞叅政楊子器
令常熟亦一二考而徑轉銓司夫何邇年以來官
不久任而各郡縣守令數遷數易視所治真若傳
舍故知府未及一考即望轉副憲知縣不過三年
即望行取中間又有應朝叅謁承委離任常至數
月少亦不下幾旬在任臨民視事不過二年其身
雖尚在舊任而其心則已在於轉官吏胥百姓亦
知其次將轉莫不觀望延挨而政事之因以廢弛
者亦多矣臣愚以為凡守令之官必當令其久任

然徒令久任而苟不爲之區處則人亦何樂乎淹
滯哉合無今後守令之官除不職者聽撫按論劾
降斥奉職無過者聽吏部循資陞轉至於賢能卓
異者則必使之久任凡遇三年考滿撫按衙門會
本保留差人齎冊繳部其一切應得誥勅命俱聽
該部類題請給而本官積有年勞在知府則三年
加俸一級候至五六年徑轉參政等官八九年徑
轉巡撫等官在知州知縣亦三年加俸一級候至
二考三考知州則徑轉方面等官知縣則徑選補
左右給事中實授御史及吏部司屬等官如此則
人知久於外任雖遲而實未嘗不速莫不各安心
供職其爲治也既久則其施澤於民也必深庶幾
郡守縣令之中當必有龔黃卓魯之政而天下可
以永底於治安矣

請治中官暴橫疏

隆慶二年

吏部考功清吏司員外郎郭

奏爲中官暴橫

撓法無君聚衆朝堂毆傷御史乞賜重究以正綱
紀事臣惟朝廷有紀綱斯天下有治化紀綱不立
則威令不行人心不飭天下未有能治者也我國
家創制立法自公卿百執事之外特設有十三道

御史其職在搏擊豪強糾察權貴出則彈壓地方入則振肅朝署是御史乃朝廷執法之官其責任固重且大也至於中官在祖宗朝其職不過傳奉洒掃而已竝不許干預外事是祖宗之法所以防範此輩而搏節之者抑何其嚴且密耶夫何邇年以來漸違祖制寵任閹尹毒流縉紳若王振之在英宗時劉瑾之在武宗時其勢甚熾而爲禍亦甚大矣然王振劉瑾之在當時雖嘗竊弄威權假傳詔旨凌辱士人然猶知有朝廷在上假詐以凌辱之耳未聞有聚衆朝堂公行肆打全不知有皇上

如今日之事者也臣於本月初九日朝罷出左掖門外忽見中官三四百人高聲喊鬧猛若虎狼攘臂稱呼勢如風雨或持短棍或張空拳擡將御史李學道衆中亂打當時悶地拔髮傷顱毀衣傷脇氣息奄奄垂死見証臣見之不勝痛憤竊伏思之朝廷者陛下之朝廷禮法之所從出也御史者陛下之耳目風紀之所由關也朝堂非毆人之地御史非擅自可毆之官至於中官亦陛下之臧獲耳初非南倭北狄之比也設令御史有罪直當訴諸上前俟詔旨如何處分何得白晝聚衆輒毆辱於

朝堂之上耶方今聖天子初立明明在上赫赫下
臨普天率土誰敢不遵奉威令若此者正以有紀
綱在耳今御史執法於下即為刑餘之輩公然毆
辱於朝堂此其紀綱安在哉陛下縱不為御史惜
獨不為朝廷紀綱惜乎紀綱不立則天下之人惟
知有權勢不復知有朝廷未有不至於亂者矣臣
聞得御史李學道近巡視中城有一無鬚男子許
義為持刀劫殺寡婦徐氏家財訐告到城比時御
史審係淨身男子責送兵馬司監候後有不識姓
名中官多人向因囑託不遂倡謀聚眾輒在朝堂

毆打御史事情顛末如此夫巡城御史奉旨祛逐
淨身男子此近日事也况緣事訐告到城即係有
罪人犯御史惟知責犯罪之人不知其為中貴此
御史為陛下執法也御史為陛下執法而無辜為
諸宦者所荼毒此豈盛世之所宜有哉臣今冒昧
言之誠願陛下大奮乾剛普施離照不為近習奸
言所惑嚴勅錦衣衛多差官校即將左右二掖門
及各門宦者并見緣事許義追究首惡幾人廷杖
示眾以正體統以雪衣冠之恥仍各叅送法司查
照律例從重擬罪具奏如此庶幾權貴知謹紀綱

稍振威柄不至下移人心不至解體太平可保天下萬世咸仰大聖人之所作爲矣使徒保護中人不惜士類苟不亟爲重處臣恐貂璫日熾則衣冠日替而海內聞之誰不垂首喪氣各自爲身謀者孰肯爲陛下執法共致太平之治耶故臣謂今日之事所係於御史一人之身者小其所關係於天下國家者則甚大臣願陛下試加省焉邇來四方奏報災異甚多中外人情恟恟咸謂陰盛陽衰此
侵中國之兆也臣則以爲
憑陵中國固爲可患而宦官用事熒惑主聽凌虐士夫貽禍邦

家此爲陰盛陽衰之兆不尤明白易見乎故臣願陛下自今以後遵守祖制熟察此輩嚴爲禁約不使得干外廷政事此尤修省實政之一大端也伏望陛下因言思奮獨斷行之則臣等幸甚海內幸甚

鯤溟郭先生詩集後序

夫詩以言志且以道性情而世之艱深其詞者爭奇於一字競巧於一句其於志奚以言哉而去性情之道遠矣自漢魏以來作者不一而騷壇之士咸推轂陶杜及孟則以近於自然而於性情爲真也余侍郭先生研席最久每抵掌談藝扼腕論事慨然謂曰富貴易消歇詩文能不朽惟吾汝可以語此余謝不敢當旣而先生鵲起推袁州司銓曹叅江藩如元震之在當時而余猶然雌伏也未幾先生與江陵相相左投劾暫歸里余亦以子爲郎

就封復聚首懽甚飲酒賦詩劇談已事共圖不朽
孰意先生先朝露哉其遺集共四卷非敢必曰某
篇似彭澤某首似杜陵某句似襄陽而三公之氣
象宛然在目睫先生之性情居然在簡編非不朽
盛事出於理吏叅知之外者哉語曰絲不如竹竹
不如肉謂漸近自然足貴也其先生是集之謂耶
且也所以不朽先生者有諫疏諸篇在而先生能
世其詩學則先生之不朽又有在矣其季子余甥
倩也請以余言質諸詩學世擅婦翁申公云誥封
奉政大夫水部郎同門友顧汝玉粟如甫序

鯤溟郭先生詩集後跋

明世宗時相嵩用事子世蕃尤驕橫不法諸御史
彈劾不遺餘力嵩乃放歸田里世蕃謫戍旣歸抗
不抵法所爲猶洋洋如平時時則有郭公諱諫臣
者司李袁郡目擊心傷乃盡摘發其不道狀因御
史以聞世宗大怒孽子授首詔公盡籍其家產以
巨萬計嚴氏因以不振嗚呼是誰之力歟乙未夏
予偶遊姑蘇與郭君介眉交最善一日以其重刊
先世稿一冊遺予持歸旅館開卷細讀乃知介眉
君即爲司李公之賢後裔而司李公前後宦遊在

吾豫章之日爲尤多也司李公剖擊嚴氏其事久
已播諸管絃雖婦人孺子莫不知之迄今讀其詩
澹雅蕭疎其於仁義忠孝之事不啻如飢渴之於
飲食故時得風人遺意焉讀至後二疏麟不覺肅
然起敬曰此楊忠愍海忠介之流雖與日月爭光
可也豈特詩人而已哉麟後生末學得覩前賢芳
躅不勝高山仰止之慕矣故不敢以不文而欣然
願贅一言於末藉以不朽記曰雖無老成尚有典
型讀斯集者其念之哉其念之哉

清江後學黃夢麟謹跋



